



Հայաստանն ու Ադրբեջանը համաձայնության են եկել խաղաղության համաձայնագրի նախագծի շուրջ. Ի՞նչ ակնկալել հաջորդիվ

ԱՊՐԻ Արմենիայի վերլուծությունը

2025 թվականի մարտի 20-ի դրությամբ

2025 թվականի մարտի 13-ին Ադրբեջանի և Հայաստանի արտաքին գործերի նախարարությունները հանդես եկան հայտարարություններով այն մասին, որ երկու պետությունների միջև խաղաղության համաձայնագրի տեքստը վերջնական տեսքի է բերվել: Այս զարգացումը տեղի ունեցավ ավելի քան երկու տարվա երկկողմ բանակցություններից հետո՝ աշխարհակարգի աճող անորոշության և անկայունության պայմաններում:

ԱՊՐԻ Արմենիայի այս վերլուծությունն անդրադառնում է այս զարգացման նշանակությանը և Հայաստանի անվտանգության և տարածաշրջանային կայունության համար դրա հետևանքներին:

Ի՞նչ տեղի ունեցավ

2025 թվականի մարտի 13-ին [Ադրբեջանի](#) և [Հայաստանի](#) արտաքին գործերի նախարարությունները հանդես եկան առանձին հայտարարություններով՝ հայտնելով խաղաղության համաձայնագրի տեքստի վերջնականացման մասին: Հայաստանն իր [պատրաստակամությունը](#) հայտնեց սկսել խորհրդակցություններ՝ համաձայնագրի ստորագրման ժամկետների և վայրի վերաբերյալ: Ադրբեջանը, սակայն, [ընդգծեց](#), որ համաձայնագրի ստորագրման նախապայման է Հայաստանի Սահմանադրության փոփոխությունը, ինչպես նաև ԵԱՀԿ Մինսկի խմբի պաշտոնական լուծարումը:

Այս հայտարարություններին մարտի 16-ից սկսած հետևեցին Ադրբեջանի պաշտպանության նախարարության մի շարք հաղորդագրություններ ([Հաղորդագրություն 1](#), [Հաղորդագրություն 2](#), [Հաղորդագրություն 3](#), [Հաղորդագրություն 4](#) և [Հաղորդագրություն 5](#)): Դրանք պնդում էին,

որ հայկական ուժերը կրակ են բացել ադրբեջանական դիրքերի վրա Հայաստանի Սյունիքի և Գեղարքունիքի մարզերի սահմանային հատվածներում: Այս հայտարարություններով Ադրբեջանն ըստ երևույթին, փորձում է պատրվակ ստեղծել Հայաստանի դեմ ադրբեջանական նոր հարձակումն արդարացնելու համար:

Հայաստանում Եվրամիության առաքելությունը մարտի 17-ին [հեքքել](#) է այս պնդումները: Հայաստանի պաշտպանության նախարարությունը նույնպես [հեքքել](#) է այդ մեղադրանքները: Հնարավոր էսկալացիայի վերաբերյալ աճող մտահոգությունների ֆոնին Հայաստանի վարչապետի աշխատակազմը հանդես է եկել հատուկ [հայտարարությամբ](#), պնդելով, որ հայկական զինված ուժերը հրադադարի ռեժիմը խախտելու ոչ պատճառ ունեն, ոչ էլ որևէ հրաման:

Հայաստանի՝ խաղաղության հասնելու ջանքերը . սիզիփոսյան պայքար

Համաձայնվելով համաձայնագրի նախագծի շուրջ աշխատանքների վերջնականացմանը՝ Հայաստանն իր հերթական կարևոր զիջում արեց՝ խաղաղության գործընթացը խթանելու նպատակով: Ամիսներ շարունակ համաձայնագրի նախագծի շուրջ բանակցությունները մտել էին փակուղի Ադրբեջանի հետևյալ պահանջների պատճառով՝ հրաժարվել միջազգային դատական ատյաններում միմյանց նկատմամբ առաջադրված պահանջներից և չտեղակայել օտարերկրյա ուժեր Հայաստան-Ադրբեջան սահմանային գոտում:

Ինչ վերաբերում է առաջին պահանջին՝ երկու երկրներն էլ դիմել են Արդարադատության միջազգային դատարան և Մարդու իրավունքների եվրոպական դատարան՝ միմյանց դեմ հայցեր ներկայացնելով: Սակայն Հայաստանի կողմից Հռոմի ստատուտի վավերացումն առանձնահատուկ վտանգ է ներկայացնում Ադրբեջանի առաջնորդների համար, քանի որ դա կարող է հիմք ստեղծել նրանց նկատմամբ դատական գործընթաց սկսելու՝ 2022 և 2023 թվականներին մարդկության դեմ գործած հանցագործությունների համար:

Երկրորդ դրույթը ենթատեքստով ուղղված էր Հայաստանում Եվրոպական միության առաքելությանը, որին Բաքուն բազմիցս վարկաբեկել է և անգամ սպառնալիքներ հնչեցրել՝ այդ թվում Ադրբեջանի նախագահ Ալիևի կողմից 2025 թվականի հունվարի 7-ի հեռուստատեսային [հարցազրույցում](#): Չնայած այս առարկություններին՝ ԵՄ առաքելությունը զգալիորեն ամրապնդել է մարդկանց անվտանգությունը սահմանային գոտում:

Նախկինում Հայաստանն [առաջարկել](#) էր եվրոպական դիտորդներին դուրս բերել սահմանի սահմանազատված հատվածներից՝ պահպանելով նրանց ներկայությունը չսահմանազատված գոտիներում՝ նրանց դիտարկելով որպես զսպող միջոց Ադրբեջանի հնարավոր էսկալացիաների դեմ: Հայաստանի կառավարությունը նաև [հայտնել](#) էր, որ պատրաստ է հետ վերցնել միջազգային դատարաններում ներկայացրած հայցերը, եթե համոզվի, որ հաստատվել

է կայուն և տևական խաղաղություն՝ հակառակ դեպքում դրանք դիտարկելով որպես Ադրբեջանի վրա ազդելու լծակ:

Ադրբեջանի տեսանկյունից, Հայաստանի կողմից դատական գործերի դադարեցումը պաշտոնապես կփակի 2020-2023 թվականների իրադարձությունների էջը՝ Ադրբեջանի վրայից հանելով 2020 թվականին Լեռնային Ղարաբաղում պատերազմի ժամանակ միջազգային իրավունքի խախտման, 2021 և 2022 թվականներին Հայաստան ներխուժելու և 2023 թվականին Լեռնային Ղարաբաղը ռազմական եղանակով զավթելու և հայերի բռնի տեղահանման մեղադրանքները:

Հայաստան-Ադրբեջան սահմանից ԵՄ դիտորդական առաքելության հեռացումը համահունչ է երկու երկրների բանակցություններից միջնորդներին և դիտորդներին դուրս մղելու Ադրբեջանի ավելի լայն ռազմավարությանը: Սա օգնում է Ադրբեջանին ամբողջությամբ օգտագործել կողմերի միջև առկա ուժերի անհավասարակշռությունը՝ առանց որևէ արտաքին միջամտության:

Հատկանշական է, որ համաձայնագրի նախագծում որևէ հիշատակում չկա ադրբեջանական բանտերում պահվող հայ ռազմագերիների մասին: Այն նաև չի անդրադառնում տրանսպորտային և հաղորդակցության ուղիների վերաբերյալ վիճահարույց հարցին, որը երկու կողմերը 2024 թվականին [համաձայնել](#) են հանել համաձայնագրից և առանձին քննարկել, ճիշտ այնպես, ինչպես դա [տեղի ունեցավ](#) սահմանագծման և սահմանագատման հարցում, երբ [ստորագրվեց](#) սահմանագատման հանձնաժողովների գործունեությունը կարգավորող առանձին փաստաթուղթ:

Համաձայնագրի տեքստը վերջնական տեսքի է բերվել ադրբեջանական մամուլում աճող տեղեկատվական [արշավի](#) ֆոնին, որը Հայաստանին մեղադրում է 2025 թվականի ապրիլին հարձակում նախապատրաստելու մեջ: **Քանի որ Բաքուն փորձում է արդարացնել նոր «կանխարգելիչ» ռազմական գործողությունը՝ իրականացնելով նաև ինտենսիվ [գորավարժություններ](#), Հայաստանի կողմից երկու չհամաձայնեցված հոդվածների վերաբերյալ Ադրբեջանի առաջարկների ընդունումը կարծես թե նպատակ է հետապնդում գրկել Բաքվին ներխուժման նոր պատրվակից և հերքել այն խոսույթը, թե Հայաստանը ապակառուցողական բանակցող կողմ է:** Այս քայլը նաև ուղիղ ազդակ է հայությանն ու միջազգային հանրությանն առ այն, որ Հայաստանը շարունակում է հավատարիմ մնալ խաղաղությանը՝ անգամ լրացուցիչ ցավալի զիջումների գնով:

Մինչդեռ, **Բաքուն շարունակում է պնդել երկու նախապայմանների իրականացման վրա՝ նախքան խաղաղության համաձայնագրի նախագծի ստորագրումը:** Սա ևս մեկ անգամ **ընդգծվել է Ադրբեջանի վերջին պաշտոնական [հայտարարության](#) մեջ:** Հարցը մնում է չլուծված. արդյո՞ք, տարածաշրջանն իրական առաջընթաց է գրանցել խաղաղության

ուղղությամբ, երբ Ադրբեջանը շարունակում է պահպանել համաձայնագրի ստորագրման համար ոչ բանակցելի պայմաններ:

Ո՞ր է այս ամենը տանում

Ինչպես [ավելի վաղ](#) նշել էինք, Ադրբեջանն, ըստ երևույթին, չունի Հայաստանի հետ խաղաղություն հաստատելու կամ, ավելի լայն, տարածաշրջանում խաղաղություն պահպանելու իրական մտադրություն: Ի հակառակ 2023 թվականի դեկտեմբերի [հայտարարությանը](#) և երկու կողմերի ենթադրյալ ծրագրերին՝ վերջին հայտարարությունը համատեղ հայտարարություն չէր:

Բաքուն երկու նախապայման է առաջադրել խաղաղության համաձայնագրի ստորագրման համար. Հայաստանը պետք է փոփոխություններ կատարի իր Սահմանադրության մեջ և այլ օրենքներում, որպեսզի վերացնի Ադրբեջանի նկատմամբ ենթադրյալ տարածքային պահանջները, և ԵԱՀԿ Մինսկի խումբը պետք է լուծարվի: Թեև Հայաստանը [բաց է](#) վերջին հարցի քննարկման համար, Հայաստանի [կառավարությունը](#) և երկրի [Սահմանադրական դատարանը](#) պնդում են, որ Սահմանադրությունը տարածքային պահանջներ չի պարունակում Ադրբեջանի կամ որևէ այլ պետության նկատմամբ:

Այս երկու նախապայմաններից բացի, Ադրբեջանը նաև լրացուցիչ պայմաններ է առաջ քաշել, որոնք խաղաղության համաձայնագրից առանձին է համարում՝

- Հայաստանի կողմից սպառազինությունների գնման պայմանագրերի չեղարկում և արդեն առաքված զենքի վերադարձ:
- Հայաստանում, այսպես կոչված՝ «արևմտյան ադրբեջանցիների» «վերադարձը» և նրանց հատուկ իրավունքների տրամադրումը՝ հիմնված Ադրբեջանի այն [պնդումների](#) վրա, որ Հայաստանի մի մասը կամ ամբողջը հանդիսանում է պատմական «Արևմտյան Ադրբեջան»:
- «Զանգեզուրի միջանցքի» ստեղծում, որն ուղիղ և անխոչընդոտ անցում է ապահովելու (առանց հայկական վերահսկողության) Ադրբեջանից դեպի Նախիջևան՝ Հայաստանի տարածքով:

Երկու այլ պայմաններ, որոնք բարձրացվել են անցյալ տարի, բայց ավելի քիչ են հիշատակվում ադրբեջանական վերջին հայտարարություններում, ներառում են՝

- «Ադրբեջանական անկլավների» վերադարձ, ներառյալ՝ Տիգրանաշենը, Սոֆուլուն, Բարխուդարլուն և Վերին Ոսկեպարը:
- Հայաստանի կողմից «Խոջալուի իրադարձությունների» ճանաչումը որպես

ցեղասպանություն:

Ադրբեջանը, կարծես թե, մտադիր է խաթարել Հայաստանի վերջին զիջումների արդյունքում ստեղծված դրական մթնոլորտը: Ադրբեջանի պաշտպանության նախարարության վերջին հայտարարությունները ամրապնդում են նրա ագրեսիվ դիրքորոշումը Հայաստանի նկատմամբ և ընդգծում Եվրամիության առաքելության կայունացնող դերը՝ որպես անվտանգության միջոց, որը Երևանն արդեն համաձայնել է փոփոխել:

Ադրբեջանը պահպանում է հետագա էսկալացիայի հնարավորությունը և ցանկացած պահի կարող է հարձակում սկսել: Առանց Բաքվի վրա էական միջազգային ճնշման՝ տեսանելի ապագայում խաղաղության համաձայնագրի ստորագրումը քիչ հավանական է մնում:

Առաջարկներ

Քանի որ էսկալացիայի ռիսկը պահպանվում է, անհրաժեշտ է երկու երկրների միջև ուժերի ավելի մեծ հավասարակշռություն և տնտեսական ու դիվանագիտական ազդեցության լծակների առավել արդյունավետ օգտագործում:

Տարածաշրջանում խաղաղությամբ և անվտանգությամբ հետաքրքրված գործընկերները պետք է շարունակեն Ադրբեջանին բացատրել, որ Հայաստանի տարածքային ամբողջականության վրա ցանկացած հարձակում՝ ֆիզիկական կամ խոսույթային, անընդունելի է և բացասական հետևանքներ կունենա, այդ թվում՝ տնտեսական: Նրանք նաև պետք է ընդգծեն խաղաղության համաձայնագրի անհապաղ ստորագրման անհրաժեշտությունը: Այս համատեքստում մարտի 14-ի ՌԴ ԱԳՆ խոսնակի [հայտարարությունը](#), որը ողջունում է համաձայնագրի շուրջ բանակցությունների ավարտը և ԱՄՆ նախագահի՝ ազգային անվտանգության հարցերով խորհրդականի մարտի 16-ի [հայտարարությունը](#), որով կոչ է արվում ավարտին հասցնել խաղաղության համաձայնագիրը և ազատ արձակել Ադրբեջանում պահվող բանտարկյալներին, ճիշտ ուղղությամբ իրականացվող քայլեր են:

Բաքվին էսկալացիայից զերծ պահելու հիմնական միջոցը ագրեսիայի արժեքի բարձրացումն է: Ուժի կամ ուժի սպառնալիքի կիրառումը Բաքվի համար պետք է լուրջ հետևանքներ առաջացնեն, միևնույն ժամանակ, գործընկերները կարող են շարունակել աջակցել Հայաստանին տնտեսական, քաղաքական և ռազմական առումով՝ որպես Ադրբեջանին հակակշիռ:

Հայաստանը պետք է դիտարկի ռազմական էսկալացիան հետաձգելու նպատակով զիջումների գնալու արդյունավետության խնդիրը: Նախորդ փորձերը (օրինակ՝ 2022 թվականի հոկտեմբերին Պրահայի [հայտարարությամբ](#) Հայաստանը ճանաչեց Լեռնային Ղարաբաղը

որպես Ադրբեջանի մաս՝ նվազեցնելու համար 2022 թվականի սեպտեմբերին Բաքվի Հայաստան ներխուժումից հետո առկա հետագա էսկալացիայի ռիսկը) ցույց են տալիս, որ այս մոտեցումը միշտ չէ, որ տալիս է նախատեսված արդյունքները:

Բացի այդ, հաշվի առնելով աշխարհաքաղաքական լանդշաֆտը, հատկապես ուկրաինական պատերազմի ընթացքը և ԱՄՆ-Ռուսաստան հարաբերությունների պոտենցիալ կարգավորումը, Հայաստանը պետք է քայլեր ձեռնարկի Ռուսաստանի հետ հարաբերությունների վերագործարկման:

Հին հունական դիցաբանության մեջ Միգիփոսը դատապարտվել է հավերժական անօգուտ աշխատանքի՝ քարը բարձրացնել բլուրն ի վեր, սակայն այն նորից հետ է գլորվել՝ ստիպելով նրան վերսկսել աշխատանքը: Մնում է միայն հուսալ, որ երկու պետությունները վերջապես կվերացնեն սիգիփոսյան անեծքը՝ կնքելով պատմական խաղաղություն արդար պայմաններով կամ էլ նրանք եւս մեկ անգամ կհայտնվեն բլրի ստորոտում՝ բորբոքելով դժգոհություններն ու նախապատրաստվելով հակամարտության հաջորդ փուլին:

Հարավային Կովկասի և այն սերունդների համար, ովքեր շատ երկար ժամանակ են անցել պատերազմի միջով, հույսն այն է, որ հանգուցալուծումը մոտ է, և խաղաղության քարը վերջապես կդադարի ետ գլորվել՝ ավարտելով Միգիփոսյան շղթան: